

國家圖書館藏

線裝書局

稀見明史史籍輯存

甲申日紀金集

興化李清映碧撰

哀帝

崇禎十七年甲申四月丁亥晦日福王至自

淮安府

王諱由崧神宗孫先福王常洵世子常洵
鄭貴妃出開邸河南府十四年流賊陷河
南遇害世子播遷河北終制嗣封毅宗手
擇宮中寶玉帶付內使賜之十七年復因

寇入河北流離入淮安府時北都失守毅
宗慘崩以倫以序應屬福王而迎立潞王
之議起潞王名常潞神宗姪也因江南在
籍諸臣恐福王立後或追怨妖書及挺擊
移宮等案謂潞王立不惟釋罪且邀功耳
時以廢籍少宗伯兩入留都倡議者錢謙
益也於是兵部侍郎呂大器主謙益議甚
力而右都御史張慎言詹事姜曰廣皆然

之丁憂山東僉事雷縉祚禮部郎中周鑣
亦往來遊說獨逆案為民阮大鍼與鳳陽
總督馬士英密且心冀燃灰書言不可時
王懼不得立書召南甯總兵高傑與黃得
功劉良佐協謀擁戴劉澤清素狡先附立
潞議至是以兵不敵改計從傑等南都諸
臣不知也方列王不孝不弟七款貽漕督
史可法轉貽馬士英為主潞王地不知傑

等與士英已歃血議立王矣可法知事勢
已決始具舟啟迎而吏科李沾與御史郭
維經陳良弼等復倡言於內然持異議者
猶呶呶也獨沾厯階而上面折大器云今
日之事何事論典禮則禮莫重於尊君論
興兵則兵莫先於衛主倘有異議者即以
一死殉之禮成告廟約二十八日登舟迎
駕是日清晨大器意尚猶豫沾馳至各臺

臣所欲追尋異議之人方定先數日士英
書約沾等云北事果真只有論序親賢早
正名位吾輩方可不負朝廷不禍身家故
沾爭甚力二十九日王舟抵燕子磯三十
日以王禮見百官素衣角帶待茶款語語
及大行輒哭失聲語嗣立輒遜謝
五月戊子朔福王謁孝陵入謁奉先殿出駐
行宮羣臣進見勸進辭

己丑羣臣上箋勸進凡三上不允止允監國

庚寅福王監國於南京

王先行拜天禮升殿受監國寶羣臣禮畢
退兵侍呂大器心怵前議欲請後日即登
極御史祁彪佳力爭謂監國之名極正今
不兩日即登極何以服人心而謝江北諸
將士宜俟發喪服滿後從之初揚州進士
鄭元勳聞立潞議言於工科左李清清曰

禍自此始矣神宗四十八年德澤猶繫人心豈可舍孫立姪况應立者不立則誰不可立萬一左良玉扶楚鄭芝龍扶益各挾天子以令諸侯誰禁之者且潞王既立置福王何地死之抑幽之耶是動天下兵也時草野聞立潞非序皆不平及王監國人心乃定以監國諭天下大赦

發大行皇帝喪諭天下

喪禮依舊制以日易月二十七日釋服毋
禁民間音樂嫁娶督撫鎮守都布按三司
官員地方攸繫不許擅離職守聞喪之日
止於本處哭三日進香遣官代行衛所府
州縣土官並免進香諭告中外咸使聞知
壬辰以都察院右都御史張慎言為吏部尚
書補本部司官顏渾梁羽明等

以北淮總兵張應元仍鎮守承天等處
命兵部郎中萬元吉宣諭各鎮

元吉先為總兵高傑監軍至是言闖賊膽
橫心雄眈眈漕粟且徐鳳間諸鎮駢集兵
民未馴欲親往宣諭務令相安以拒逆賊
又聞高傑已駐揚州請發萬金并往犒賚
然後會同文武諭以大義共固江淮從之
元吉渡江躬行諸鎮營酌頒犒賚勉以大

義又言江南輦轂重地不便安插家口諸
鎮唯唯時傳黃得功劉澤清高傑等爭占
揚郡元吉復泊舟儀真會得功先至移書
期以首倡協恭共襄王室得功得書如元
吉言乃抄白米緘馳示澤清與傑嫌始漸
解元吉請督輔史可法速赴任為四鎮畫
地分守又以傑所率兵稍強而橫乃議以
傑兵隸可法外示親信陰寓調劑庶不至

荼毒一方之民皆其苦心也

御史祁彪佳疏陳致治大本監國嘉納之
疏言殿下渙頒大號沛發明綸雖為繼統
實同勗業以仁厚歸群情以嚴肅定衆志
此明紀綱飭法度之說也伏望申諭群臣
此時典制益宜遵守勿以多事逐紛爭之
端名器益當慎重勿以乏才啟濫幸之竇
人才不可不愛惜而自媒之徑不可開官

爵不可不優崇而躋遷之階不可有恩賞
固宜普當為可繼之地勿生無厭之覬覦
開釋固宜速當核可原之條勿紊罔貸之
刑章庶幾紀綱明法度飭然後以輕徭薄
賦收民心以舉賢錄才收士心以信賞必
罰收將卒之心言守固言戰勝矣更有進
者殿下一心尤為紀綱法度之本念念敬
天則天休滋至念念法祖則祖澤靈長念

念勤民則民情益忻戴後其言皆驗
允廷推進南京兵部尚書史可法東閣大學
士兼兵部尚書改南京戶部尚書高弘圖為
禮部尚書進東閣大學士俱入閣辦事總督
鳳陽部院馬士英進東閣大學士兼兵部尚
書都察院右副都御史仍督鳳陽
時弘圖陳新政切要八事一曰正義問欲
下明綸正逆賊之罪以鼓忠義二曰御講

帷欲不俟釋服更日直講三曰設記註欲
召詞臣侍立記監國言動送貯內閣四曰
睦親藩欲依列聖踐極遣使各藩賚璽書
慰告五曰議廟號欲製列聖主權附奉先
殿仍於孝陵側望祭列聖山陵六曰嚴章
奏欲毋使小人奸徒借端立說脫罪思倖
七曰固江防欲將江北河北山東等處正
稅本折等從崇禎十六年以至十七年盡

行蠲免無為賊小惠所愚八曰詳詔使欲遣詞臣科臣招徠朝鮮以覘女直之順逆合散並嘉納之

甲午陞詹事府詹事姜曰廣為禮部尚書在籍禮部尚書王鐸以原官兼東閣大學士同入閣辦事

曰廣附立潞議故監國未點命再推詞臣數人乃更益以鐸陳子壯黃道周疏上曰

廣興鐸俱點曰廣尋辭尚書改左侍郎

推補科員張元始等

陞工部右侍郎兼都察院右僉都御史周堪

為戶部尚書兵部侍郎呂大器為吏部左

侍郎起陞原任陝西巡撫練國事為戶部左

侍郎總督倉場原任天津巡撫賀世壽為刑

部左侍郎升太常寺卿何應瑞為工部左侍

郎應天府尹劉士禎為通政使司通政叢